

Lwgdouq Coengmingz

Lwgyiengzbya caeuq lwgdouq doxceng. Lwgyiengzbya fatheiq, de siengj hwk lwgdouq, ok gaemz heiq neix.

Banhaemh, lwgdouq cingq youq ndaw ranz yawj saw. Sawqmwh rog cueng cienz daeuj sing rongx ndeu: “Lwgdouq dingq ndei, gou couh dwg nyaenma, gou ngoenzneix yaek gwn mwngz.”

Lwgdouq baez doeksaet, ngiengx gyaeuj yawjraen bakcueng benz hwnj duz nyaenma ndeu, lau yaek dai bae. Hoeng dang de yawjraen gaiqga nyaenma gwnz daizcueng seiz, youh riu lo, de naeuz: “Gaej hwk vunz lo, mwngz gwn mbouj ndaej gou. Lij dwg deuz ba. Gaej youq gizneix nauh lo.”

Rog cueng mbouj miz singyiem lo, lwgdouq liuh daengz “nyaenma” byaij deuz lo.


Ngoenz daihngaih banhaemh, lwgdouq cingq youq ndaw ranz sij cozyez, bakcueng youh cienz daeuj sing rongx ndeu: “Lwgdouq dingq ndei, gou dwg manaez, gou ngoenzneix

yaek gwn mwngz.”

Lwgdouq youh baez doeksaet, ngiengx gyaeuj yawjraen bakcueng benz hwnj duz manaez ndeu, lau yaek dai bae, hoeng dang de yawjraen gaiqga manaez gwnz daizcueng seiz, youh riu lo, de naeuz: “Gaej yaeuh vunz lo, mwngz gwn mbouj ndaej gou, lij dwg byaij deuz ba! Gaej youq gizneix nauh lo.”

Ngoenz daihsam banhaemh, lwgdouq cingq youq ndaw ranz swiq lauxbaeg, rog cueng cienz daeuj sing rongx ndeu: “Lwgdouq dingq ndei, gou dwg duzguk daihvuengz, gou ngoenzneix yaek gwn mwngz.”


Lwgdouq baez doeksaet, ngiengx gyaeuj yawjraen duz guk ndeu benz youq bakcueng, hwk ndaej ndang saenzdedded. Hoeng dang de yawjraen ga duzguk gwnz daizcueng seiz, haha riu hwnjdaej. De mbouj naihfanz naeuz: “Gaej nauh lo, mwngz mbouj dwg duzguk daihvuengz, gwn mbouj ndaej gou. Guk daihvuengz caeuq nyaenma, manaez ityiengh, ga cungj



dwg miz nyauj. Mwngz swgheij yawjyawj, benz youq gwnz daizcueng dwg song aen daez. Sojmiz doenghduz ga maj ve cungj dwg gwn nywj, caeuq duzdouq dwg baengzyoux, itdingh mbouj gwn gou. Cang nyaenma, cang manaez, cang duzguk daihvuengz hwk mbouj ndaej gou.

Mwngz dwg lwgyiengzbya, raeuz doxndei ba!”

Lwgyiengzbya baez dingq, rox deng lwgdouq nyinh okdaej lo, de roxnyinh swgheij mbouj doiq. Ngoenzlaeng youh bae ra lwgdouq guhcaemz, song boux baengzyoux youh doxndei lo. (Mungz Ningz hoiz)



Ranzmbanj

Daxboh naeuz, bouxboux cungj miz ranzmbanj, giz vunz doekfag caeuq majhung de, couh-dwg ranzmbanj. Hoeng daengz seizneix, gou lij mbouj rox gizlawz dwg ranzmbanj gou.

Ranzmbanj bohmei couh dwg ranzmbanj gou lwi? Hoeng daxboh naeuz, gou doekfag youq Namzningz, ranzmbanj bohmei liz Namzningz gya' gyanggyang bae, gou cungj caengz ndaej raen gvaq ne.

Giz caengz ndaej raen gvaq de, guhlawz suenq dwg ranzmbanj swgheij ne? Nyaenx Namzningz dwg ranzmbanj gou lwi? Hoeng daxmei naeuz, gou youq Namzningz ngamq ndaej hopbi ndeu couh daeuj Byalax Cibfanh gizneix lo, seizneix gou ndaej seiq bi gvaq, gou dwg youq gizneix majhung bw, mbouj dwg youq Namzningz majhung ne. Namzningz baenz yienghlawz, dwg mbouj dwg bya lai lumj gizneix, gwnz bya miz mbouj miz maknim baenz lai, gou saek yiengh cungj mbouj rox nauq.

Giz mbouj dwg swgheij maj-

hung de, giz baenz yienghlawz cungj mbouj rox de, guhlawz dwg ranzmbanj swgheij ne. Nyaenx, gizneix suenq dwg ranzmbanj gou luba? —Ai, gou guhlawz huk baenzneix ne, giz mbouj dwg swgheij doekfag de, guhlawz ndaej suenq guh ranzmbanj swgheij ne.

Nanzdauh, gou dwg mbouj miz ranzmbanj ma? Mbouj baenz bw! Bouxboux cungj miz ranzmbanj, hoeng ranzmbanj gou youq gizlawz ne?

Mboujguenj baenzlawz, gou cungj dwg vunz Cungguk. Mboujguenj dwg doekfag youq gizlawz, goj mboujguenj dwg majhung youq gizlawz, gou cungj dwg doekfag youq Cungguk, youq Cungguk majhung, gieneix guhlawz cungj mbouj loeng luba?

Nyaenx, ranzmbanj gou couh-dwg Cungguk, youq Cungguk raeuz, gizlawz cungj dwg ranzmbanj gou.

(Daj «Bonsei Sim Lwgnyez» (Veiz Gizlinz raiz) senj okdaej, Lwgfwnzmei(Luz Fwncang)/卢奋长 hoiz)

Aenngaeuz Daxboh

Gou miz daxboh unqswnh ndeu, de miz simgyaez, fouzsei, simndei……Doenghgi neix gou cungj maij, mboengq angqyangz gou caeuq daxboh caemhyouq haenx engqgya hawj gou nanzlumz.

Seiz iq, gou dam ninz dangq-maz, yungzheih ninznaek dangqmaz. Seizde, daxboh cungj yaengyaeng umj gou hwnjdaej, got coq ndaw rungj, ngauez gou couh caeuq daxboh doxdaeb youq giz ndeu lo.

Hwnj youwzyenz le, daxboh gyaez caeuq gou guhdoi guh “cazgi dungcoz”. Beijlumj, gou gwih youq gwnz mbaq daxboh, song fwngz got gyaeuj de maenhwnwnwng bae,

seizneix, ngauez daxboh couh “maj” sang mboengq ndeu; gou iet song gen, aenngaeuz daxboh couh miz song gaiq gau iq.

Geiq ndaej bi' gvaq seizhah, dienheiq oemndat lai, gou hemq yaek gwn naesa. Daxboh dingj nditndat daiq gou bae cawx. Gyoengqvunz baizdoi cawx naesa haenx miz geijcib mij raez, gou ndwn youq giz rieng, haidaeuz vanzlij cingsaenz dangqmaz, deng ndit dak haenq lai le, gou couh naiqneukneuk ngaem gyaeuj dingh youq lo.

Gou yiengh hojlien lai, beng riengbuh daxboh, de miz di hozndat yawj gou, danhseih rag gou haeuj laj ngauez de bae. Gou boux iqet neix ndwn youq laj aenngaeuz hungsang haenx ngamjhab ndaej dangj ndit. Miz ngauez daxboh dangj ndit, gou couh gag guhcaemz, lumz daxboh vanzlij youq laj daengngoeng deng ndit dak ndatfwdfwd.

Daxboh deng ndit dak ok hanh le buh mbaeq liux. Gij feihdauh naesa, gou geiq mbouj ndaej lo, cij geiq ndaej daxboh yaengyaeng doihai gij naesa gou soengq daengz henz bak de haenx, riu naeuz: “Daxboh mbouj ndat.” Daengngoeng doek baihsae, aenngaeuz daxboh deng rag ndaej raezrangrang bae……

Gou rox, haengjdingh miz ngoenz ndeu, aenngaeuz daxboh mbouj caiq daengj soh, danhseih ngauez dou haengjdingh ciengxlwenx doxing caemhyouq, yiengjsouh gij saedceij vuenyungz aenngaeuz “doxdaeb”!

(Maj Cisiengz)

